

lis Gnovis

■ TRENT. 25 agns di «Aministrazion condividue»

Ance se in Friûl cheste forme di «sussidiarietà orizzontâl», favorite dal articulo 118 de Costituzione, e stente a sforzi, l'«Aministrazion condividue» e finis 25 agns. Il cjadalan al sarà memoreât a Trent, dulà che cheste pratiche di partecipazion comunitarie e je stade implantade. Li dal Palaç di Jurisprudenza, ai 20 di Zenâr, si farà una grande convigne, cui intervients di Vincenzo Cerulli Irelli («L'amministrazione condivisa nel sistema del diritto amministrativo»), di Daria de Pretis («Principi costituzionali e amministrazione condivisa»), di Alessandra Pioggia («La società della cura nella Costituzione»), di Fabio Gigliani («Evoluzione degli strumenti dell'amministrazione condivisa»), di Marco Bombardelli («L'organizzazione dell'amministrazione condivisa») e di Marianella Scavi («Amministrazione condivisa come innesco al necessario cambiamento paradigmatico della democrazia»). Lis conclusions lis farà Gregorio Arena, che za fa 25 agns al à inviât la riflessione scientifica sun cheste forme inovative di colaborazion fra Comunitâts e Amministracions publichis.

■ PORDENON. «Ripartire» con «ActionAid»

In grazie di dôs classis tiercis dal «Iris Zanussi», anche il Friûl concuardiês al è ingaiât tal projet trienâl «Ripartire», imbastît di «ActionAid», par fâi cuintri a la puaretât educative, profundint lis tematichis dal impegn civic e de partecipazion democratiche. A Pordenon, l'iniziativa e je prudelade dal Cumon e de Fondazione «Ragazzingio». Te seconde anade dal projet, si profundissârà il confront sui spazi de democrazie tes scuelis. Chei altris teritoris impegnâts a son L'Aquila, Ancona, Trebisacce e il Municipi VI di Rome. «Il percors Ripartire e je un'esperienze fundamentâl di cittadinanza active – al à sclârît il dirigjent di «Iris Zanussi», Piervincenzo Di Terlizzi –. Il coinvolgiment de scuele, dal teritori e des istituzions ur pant ai students la curie dai grancj pal lôr avignî e par ch'a diventin protagoniscj de sô costruzion».

■ GURIZE. Une preson europeane

Il Cumon di Gurize i à confidât a Enrico Sbriglia il compit di projetâ la realizazion di une vere «preson europeane» e di un Centri di ricercje internazionâl pe sigurece e pe justizie, ch'a nassaran là ch'al jere il vieri ospedâl civil. Sbriglia al à stât dirigjent gjenerâl de Amministrazion penitenziarie taliane e al varà d'inmanê un mût par meti in vore lis regulis de Cort di justizie europeane e dal articulo 27 de Costituzione, di mût che la preson e deventi pardabon un imprest di rieducazion, dulà che la dignitât dal condanât e je simpri respetade.

■ GJENUE. I agns furlans di Pasolini

Framieç dai documents proponûts da l'esposizion «Pier Paolo Pasolini. Non mi lascio commuovere dalle fotografie», a son in mostre anche 50 fotografai dai agns furlans dal poete. La documentazion ur è stade ufierte a la clape «Suazes» e a la Fondazione «Palazzo Ducale» di Gjenue dal «Centro studi» di Cjasarse (www.palazzoducale.genova.it). La rassegna fotografiche, ch'e restarà imbastide fintremai ai 13 di Març, e je curade di Roberto Carnero e di Marco Minuz.

Mercus 5	S. Amelie martare	Domenie 9	Batissim dal Signôr
Joibe 6	Epifanie di nestri Signôr	Lunis 10	S. Aldo rimit
Vinars 7	S. Lucian martar	Martars 11	S. Paulin di Aquilee
Sabide 8	S. Severin vescul	Il timp	Zornadis frêdis.



Il soreli
Ai 5 al jeve aes 7.49
e al va a mont aes 16.36.



La lune
Ai 9 Prin cuart.

I proverbi
Une volte si le fâs a ducj, dôs a cualchidun,
trê a dinissun.

Lis voris dal mès
Il frêt dal Invier al beche e la Nature e domande
di polsâ ancjemò par un pôc.

Sclâf dal Idroelettric

Petizion in Consei regionâl par liberâ il Tiliment

E je ore passade che «la societât regionâl, massime ch'è furlane, cun dutis lis sôs articolazions – Region, istituzions locâls (sore il dut chês ad ôr de aghe), clapis ambientalistichis, sportivis, culturâls e ricreativis, scuelis, Universitât dal Friûl, studiâts, personis e clapis che si ocupin dal flum in ogni maniere – e palesi di vè une cussience clare dal valôr dal Tiliment e ch'è decidi di distrigâ lis cuistions plui intrigosis de sô gestione».

Se di no, mieç flum al restarà un gravâr sut e arsît, mieç flum al sarà disvinidrit des golis di un'agricoltore simpri plui bramose di aghe e mieç flum al continuerà a jessi una menace mortâl par vie des montanis.

La cuistion e je tornade di atualitât, sul spirâ dal an, cuant che il Comitât pe protezion des aghis dal bacin montan dal Tiliment i à consegnât al president dal Consei regionâl, Piero Mauro Zanin, lis firmis de Petizion «Ridiamo acqua al Tagliamento e istituzione de Le Giornate del Tagliamento / Las Zornadas dal Tajament / Die Tages des Tagliamento Flusses / Dnevi reke Tagliamento». Franceschino Barazzutti, te convigne dai 16 di Dicembar, al à rapresentât chei passe mil e 300 eletôrs ch'a àn firmât il document, tornant a denunziâ dutis lis criticitâts dal «re des aghis alpinis» ch'al è ridusût un biât «sclâf dal idroelettric», cuntun 80 chilometris di cors desertificâts des derivazions sfrutadis de «multi-utility» lombarde «a2a».

Cun Barazzutti e Zanin, si son confrontâts i conseîrs Luca Boschetti («Lega»), Cristian Sergo («M5S»), Massimo Moretuzzo («Patto per l'Autonomia») e Furio Honsell («Open Sinistra Fvg»).



Di man çampe: Furio Honsell, Luca Boschetti, Piero Mauro Zanin, Franceschino Barazzutti, Massimo Moretuzzo e Cristian Sergo

Mil e 300 citadins a domandin l'istituzion des «Zornadas dal Tajament / Die Tages des Tagliamento Flusses / Dnevi reke Tagliamento»

L'instancabil puartevôs dal Comitât promotôr, Franceschino Barazzutti, al à marcât lis rivendicazions populârs, ch'a pretendin ch'è sedi tornade al Tiliment «une puartade costante e dignitose par dut il timp dal an» e che, fin cuant che dut il sisteme idroelettric dal Tiliment nol sarà deventât proprietât regionâl (cemût ch'è stabilis la leç 12/2019), «a2a» e sedi persuadude a «tornâ a meti in vore l'integritât dal cors montan dal flum... vierzint i scarics dai manufats di captazion e di sbarament, tai timps dal an cuant che lis

centrâls di Dimpeç e di Somplât a funzionin in mût ridot o ch'a son fermadis».

In chest mût, e podarès deventâ la propueste di batiâ chei timps «Le Giornate del Tagliamento / Las Zornadas dal Tajament / Die Tages des Tagliamento Flusses / Dnevi reke Tagliamento», jemplantju di ativitâts sportivis, come garis di «canoeing» o di altris sports, di iniziativa ricreativis e culturâls, cun efietis positifs pal turisim e pes necessitâts de agricolture.

Mario Zili

«Il Tiliment nol sarès Tiliment se la Fele no i des aliment»

Seont il president dal Consei regionâl, Piero Mauro Zanin, ch'al à ricevût il Comitât pe protezion des aghis dal Tiliment ai 16 di Dicembar, «la cuistion de aghe e scuene jessi frontade cuntune vision triple: sociâl, economiche e ambientâl». Al è ce ch'a spietin anche i passe mil e 200 firmataris de Petizion «Un patrimonio comune da proteggere. Liberiamo il fiume Fella dalle speculazioni». Il document, consegnât ai 12 di Zenâr dal 2021, intun an, al à rivât dome a jessi assegnât a la IV Comission dal consei cence jessi mai discutût.

Peraulis in dismentie par cure di Mario Martinis

❖ SLAVIN

s.m. = franamento (dal latino labina "frana", da labes "rovina, frana" con prefisso rafforzativo s-)

La strade pe mont e je stade sierade par un slavin di nêf.
La strada per la montagna è stata chiusa per una slavina di neve.

❖ SLAVUÀÇ

s.m. = acqua abbondante, da piccolo allagamento (dal latino labina "frana", da labes "rovina, frana" con prefisso rafforzativo s- ed un suffisso peggiorativo -uac)

Cul slavauç di orsere o ai ruvinât il mantil.
Con l'acquazzone di ieri sera ho rovinato la tovaglia.

❖ SLICHIGNÔS

agg. = schizzinoso (participio passato de verbo slichignâ, formato da lichignâ con il prefisso rafforzativo s-, da germanico lekkon "leccare")

Sese e je une zovine un pôc slichignose.
Teresa è una ragazza un po' schizzinosa.

❖ SLINGHINÂ

v. = tintinnare, suonare, squillare (voce onomatopeica)

Sintistu ce che a slinghinin lis campanelis de gleseute te tavie?
Senti come tintinnano le campane della chiesetta nella piana

❖ SLUDÂSI

v. = distrarsi; dimenticare per poco tempo perché si è distratti (voce dotta dal latino ludere "giocare", a sua volta da ludus "gioco" con prefisso rafforzativo)

No sai dulà che al è lât gno nevôt, parce che mi soi sludât.
Non so dove è andato mio nipote, perché mi sono distratto.

❖ SMAMÏT

agg. = svaporato, svanito, scolorito (participio passato del verbo smamî "svanire", detto del vino lasciato a contatto con l'aria o mantenuto in vasi non tappati adeguatamente, da mamo "colui che fa lo sciocco", o "colui che finge di essere sciocco")

A me gneçe no i plasìn lis bevandis smamidis.
A mia nipote non piacciono le bevande svaporate.